

նա դարձեալ անկախ է եւ լաւագոյն դէպքում միայն դաշնակից :

Եւ մեր աշխարհի այս մշտայոյց, բարձրագլուխ, անհանգիստ ու ըմբոստ վիճակն էր, որ Վերդիլիոս ամփոփեց իր խորհրդանշական եւ նշանաւոր տողերի մէջ՝ «Եւ կամրջընկէց Արաքսը եռում է իր ափերի մէջ» :

Սա մեծագոյն վկայութիւնն է, որ այդքան պատկերաւոր ձեւով հաստատում է հայ ժողովուրդի ազատասէր խառնուածքը եւ մարտական ոգին :

Կամրջընկէց եւ անհանգիստ Արաքսը հանդարտացնելու համար բաղմաթիւ ռազմական ձեռնարկներից յետոյ, Հոռոմը դիմում էր վերջապէս իր իսկ շահերի տեսակէտից լաւագոյն եղանակին : Նա ճանաչում էր Հայաստանի բացարձակ անկախութիւնը եւ բարեկամութեան դաշինք էր կոռւմ նրա հետ : Այսպէս սկսուեց Արշակունի առաջին հայ թագաւորի իշխանութիւնը Հայաստանում, Ներոնի օրօք :

Մեր Տրդատ առաջինի ճամբորդութիւնը այդ առթիւ դէպի Հոռոմ ոչ միայն մեր, այլ եւ հռոմէական պատմութեան մէջ խոշոր քաղաքական երեւոյթ էր : Հայ թագաւորը ճամբորդում էր իբր մեծագոր եւ անկախ միապետ : Երեք հազարանոց մի ճիւղաւոր բանակով, շքեղ շքախումբով՝ ուղեկցութեամբ իր թագուհու, որ նստած էր գեղեցիկ երիվարի վրայ, ոսկէ սաղաւարտը գլխին, եւ մագերը հովերին տրւած եւ որ ի դէպ վ ասել, հանդիսանում է հին աշխարհի լաւագոյն ամազօնը, որ կտրել ու անցել է միանգամից երեք հազար քիլոմէթր :

Հայ արքայի այս բազմահազար շքախումբով ճամբորդութիւնը, որ կատարւում էր ի հաշիւ Հոռոմի, ահագին դուժար նստեց կայսրութեանը : Հոռոմի տիրապետութեան սահմաններից սկսեալ սենագրի հրամանով Տրդատ առաջինին մեծ ինքնակալի վայել պատիւներ տրուեցին մինչեւ Հոռոմ, ուր Ներոն նրան ընդունեց չտեսնուած շուքով : Կայսրութեան մայրաքաղաքը տակաւին երբեք ականատես չէր եղած այն մեծածախս հանդէսներին, որով Հոռոմը փառաւորեց հեռու Արեւելքից եկած հայոց միապետը : Ի յրումն ամենայնի, Ներոն ինքը իր ձեռքով հայոց Տրդատի գլխին դրեց արքայական ոսկեհուռ թագ :

Անշուշտ խորիմաստ եւ հեռատես Հոռոմը բոլոր այս ծախքն ու զոհողութիւնները չէր կատարում սոսկ ամբոխին դուարձացնելու կամ Արեւելքի մի իշխանը պատուելու համար : Այս միջոցով սենագր ճգնում էր վերջ դնել Հայաստանի եւ Հոռոմի կռիւներին եւ տեւական խաղաղութիւն հաստատել մեր սահմաններում :

Մասնաւոր մի բախտ էր, որ վիճակուեց Տրդատ առաջինին : Եղբայր պարթեւական Արշակունի թագաւորին, միաժամանակ պսակաւորուած Հոռոմում, իր օրօք Հայաստանը հանդիսանում էր մի տեսակ խաղաղութեան հանդրրուան Արեւելքի եւ Արեւմուտքի, այսինքն՝ Հոռոմի եւ Տիւրքոնի մէջ : Մեր աշխարհի այս հանդատութիւնը բնականապէս տեւեց այնքան, որքան նրա հարեւան երկու մեծ պետութիւնների շահերն ու կամքն էին պահանջում : Հայաստանի բախտն իր ձեռքում չէր, եւ յետագայ մեր Արշակունի թագաւորները հակառակ էրենց բոլոր հեռատեսութեան, բոլոր խոհեմութեան ու աչալրջութեան, միշտ վտանգաւոր երկընտրանքի առջեւ մնացին քաղաքակաւնապէս՝ Հոռոմ, թէ՞ Պարսկաստան : Եւ այս դաժան երկընտրանքը դամոկլեան սրի պէս հայոց աշխարհի վրայ կախուեց, այնուհետեւ բոլոր դարերի ընթացքում մինչեւ նորագոյն ժամանակները, մինչեւ մեր օրերը :

Համակ մեր պատմութիւնն է այս, մեր բախտը, մեր թշուառութիւնը եւ մեր ճակատագրի մեծութիւնը :

Ի՞նչ վատ է աւանդուել մեզ մեր պատմութիւնը մեր մանուկ օրերին : Գէթ այսպէս է կրթուել իմ սերունդը : Հայ թագաւորների բաւական անդոյն շարան, հայ հայրենիքի միշտ նկուն վիճակ, թշնամու՝ օտարի մեծութիւն եւ զօրութիւն, բռնակալների աւեր, բարբարոսների արշաւանք եւ անծայր խեղճութիւն մեր ազգի, որ մղձաւանջի պէս աշնանային ցուրտ մառախուղով իջել է մեր սարսուացող մանուկ հողիների վրայ : Մեր պատմութեան իմաստութիւնը, նրա խոհական եւ հոգեպարար շրջանները, ինչպէս եւ մեր նշանաւոր արքաների ու աննման զօրավարների իսկական կեանքն ու պատկերը գրեթէ միշտ կամ վրիպել են մեր ուսուցիչներից եւ կամ փոքրացել ու աննշան դարձել օտարների համեմատու-